

# INUIT ATAQATIGIIT

## INATSISARTUNI



UPA 2014/51  
28.05.2014  
Ane Hansen

**Kommunini politikki nunalu tamakkerlugu politikki angutit arnallu naligiinnerusumik sinnisoqalernissaat siumut isigaluni qanoq qulakkeerniarsinnaaneripput pillugu apequteqaat aallaavigalugu oqallittoqarnissaanik siunnersuut.**  
(Inatsisartunut ilaasortaq Naaja H. Nathanielsen, Inuit Ataqatigiit)

Inatsisartuni ilaasortaq Naaja H. Nathanielsen Inuit Ataqatigiit qutsavigerusupparput apequteqaat aallaavigalugu oqallisissiamik soqutigintumik qaqtissimat.

Ukiut 66-sit arnat taasisinnaalerneraniit qaangiussimagaluartut suli qinikkani arnat angutillu naligiinneqaagut. Ajornartorsiullu tamanna pissutaaqataanginnerpa maanna nunat avanarliit killiit akornanni arnat ikiligaluttuinnarnerat upernaq manna Inatsisartuni ataatsimiinnitsinni imm. 18-mi oqallisigisariaqalersimagatsigu. Naatsorsueqqissartarfiup kisitsisaataasa kingullit takutippaat Nunatsinni arnat angutitut naleqqiulluta 3.000-it missaanit ikinnerulersimasugut. Tamatumalu pisariaqalersippaa arnat angutillu amerlassusaata naligiikkunnaariartuinnarnerat pillugu iliuseqartariaqaleratta ilisimasalinnillu misissuititsinissamik siunniussaqluta.

Misissuinerit takussutissat tamarmik tikkuuppatigut arnat periarfissagissaarnerusunut ingerlaqqittartut amerliartortut, ilinniagaqarfinni qaffasinnerusuni arnat amerlanerulersimasut, illoqarfinni periarfissagissaarnerusuni arnat nuuttartut amerliartortut. Nunanut siuarsimanerusunut arnat nuuttartut aamma amerliartortut. Paasisagut tamakkua takussutissanut ilaapput arnat naalakkersuinnikkut suli pitsaanerusumik inissisimalernissaannut aqutissiuoqartariaqartoq, soorlu aamma naalakkersuinnermi qinikkat suleriaasiat arnanut ilaqtariinnullu naleqqussagaanerusoq pisariaqartinneqartoq.

Qaasuitsup Kommunalbestyrelse-ani qinikkani 21-viusuni arnat marluinnaagatta ataatsimiinnerni amerlavallaani anguterpassuit akornanni kisimiittariaqartarpunga. Naligiingissuseq taanna pissutaaqataasorisarpara suliassani amerlavallaani illuinnaasiortumik nalersuisarnitsinnut, tamannalu pissutaaqataasartoq suliassani amerlavallaani ilisimasat amigaataasartut pitsangorsaanissanut ilaqtariinnullu tungasuni amerlavallaatigut kingaatsuinnarmik ineriartortitsinermut peqqutaaqataasarmata.

Qinigaaffimmi allami tassalu Inatsisartuni Inuit Ataqatigiit akornanni arnat angutillu naligiinneruvugut, tassanilu misigisarpara oqimaqatigiinnerusumik ilisimasallu siammasinnerusut tungavigalugit nalilersuisarluta sulisartugut. Tassanilu suliani pitsaassuseq siammasinnerusumik nalilersuineq pissutigalugu angusaqarluarnerusartugut.

Naligiissitaaneq suliassaavoq pingaarutilerujussuaq, taamammat tulluusimarutigisarpara partii ilaasortaaffigisara malittarisassamini pingaarnertut naligiissitaanermut apeqqutit qitiutimmatigut, tamannalu pitsaassusilimmik sulinitsinnut qitiulluinnarmat. Inuit Ataqatigiit anguniartarpaat qinigaaffinni tamani arnat angutillu naligiikkannerlutik inissisimanissaat, tamannaavorlu pitsaassusilimmik sulisarnitsinnut qitiulluinnartoq. Tamannalu naalakkersuinnermi suliqaqtunut tamanut innersuunnaqaaq.

Sutigut tamatigut arnat angutillu akornanni naligiissitaavinnissaq suli anguniagassaasoq miserrattissaanngilaq. Maannamut annertuunik angusaqarnikuuvugut, pingaartumik inatsisiliornikkut. Taamaakkaluartoq naligiissitaavinneq angutserlugu suli suliassaqaangaatsiar-

pugut. Inuit Ataqatigiit nangillutik ilaqtariinnikkut, atoqatigeeriaatsit persuttaasernerillu pillugit ilinniartitaanikkullu naligiissitaanissaq immikkut qitiutillugit suliniuteqartuarniarput. Taakku tungaasigut sulii equngasoqarpallaarpoq.

Pisussaaffeqarpugut innuttaasut kikkulluunniit inuiaqatigiinni peqataanissamut assigiimmik appakaateriarnissaannut qulakkeerinnittumik killiliussanik suliaqassalluta.

Arnat angutillu qinigaaffinni tamani naligiinnerullutik sulilernissaannut pitsangorsagassavut sulii amerlaqaat. Qinigaaffinni sulineq ilaqtariinnermut inissaqartitsinerusoq suliaassaavoq. Qinigassangortitsisarnermi arnat angutillu naligiinnerullutik sassartinneqartarnissaat suliasaavoq.

Naalackersuinikkut sulinermi angutit arnallu naligiinnerusumik sinniisoqalersinnaanissaat angutserumallugu taamaammat naalackersuinikkut sulinermi suleriaaseq atorneqartooq qimerloorlugu aallartiffigisinnaavarput, soorlu siunnersuuteqartup tamanna aamma tikkuaraa. Ullutsinni 2014-imi naalackersuinikkut sulinermi atugassarititaasut ullutsinnut naleqqunnersut nutaaliaanerusullu pilersittariaqarpavut.

Pissaanerup agguataarneqarnerani isummersueqataallutillu aalajangersaasussat tassaa-sariaqarpugut angutit arnallu, inuusuttut utoqqaallu aammalu inuit assigiinngitsunik misilitagaqartut. Taamaaliorsinnaanngoruttami aatsaat oqallinnerit naalackersuinikkut aalajangernernik naggaserneqartartut alakkaamanerusut aammalu siammasinnerusut qulakkeersinnaanngussavagut.

Taamaattumik oqallissaarisoq Naaja H. Nathanielsen qutsavigeqqillugu naggataatigut kajumissaarutigissavarput Inatsisartut Siulittaasoqarfiata aammalu Nunatsinni Naligiissitaanermut Siunnersuisooqatigiit siulersugaannik suleqatigiissitamik pilersitsisoqassasoq. Suleqatigiissitap sulassarissavaa kommunini politikkimi, nunaqarfinni aqutsisuni nunalu tamakkerlugu politikkimi angutit arnallu naligiinnerusumik sinniisoqalernissaat qanoq qulakkeerneqarsinnaassanersoq pillugu inassuteqaasiornissaq.